

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaat nr. 20, 18. november 2010-meersoq (Aggersarneqariataarsinnaanermut atatillugu akeqanngitsumik biileqartitaaneq, suliffeqarfinnik killilimmik akileraartussaataasunik allanngueq, akuersissutinik piginneqataassutinik nalikilliliineq, siunissami misissueqqaarnermut aningaasartuutissanut atugassanik akuersissutinik piginneqataassutit ilaannik akilersillugit tunniussineq, avataaneersunut kommunit akileraarfissat aamma tamakkiisumik akileraaruteqartitsinermit aqqissuussineq kiisalu iluanaarutisiaqartitsinermit malittarisassanik erseqqissaaneq)

§ 1

Aningaasarsianit akileraarutit pillugit Inatsisartut inatsisaanni nr. 12, 2. November 2006-imeersumi, kingullermik Inatsisartut inatsisaatigut nr. 3, 30. november 2009-meersukkut allanngortinneqartumi, makkua allanngortinneqarput:

1. Inatsimmi “Kalaallit Nunaanni atortussiassat aatsitassanik pisut il.il. pillugit inatsit”-mik allassimasut tamarmik allanngortinneqassapput imatut “Aatsitassat pillugit ingerlatallu tamatumunnga pingaarutillit pillugit Inatsisartut inatsisaat”

2. § 19-imi imm. 9-tut ilanngunneqassaaq:

“Imm. 9. Biilit imm. 5-imi taaneqartut atorlugit angerlarsimaffiup suliffeqarfiullu akornanni biilernerit akileraartussaataasup namminerisamik atuinerattut isigineqanngillat, sulisitsisup aggersarneqariataarsinnaanermut atatillugu taamatut biilernissaq akileraartussaataasumut allaganngorlugu piumasaqaatigisimappagu.”

3. § 22, imm. 1-imi ”Selskabit il.il.” kingornanut ilanngunneqassaaq ”§ 1, imm. 1, nr. 3-14 malillugu tamakkiisumik akileraartussaataasut, imaluunniit § 2 malillugu killilimmik akileraartussaataasut”.

4. § 22, b-tut nutaamik ilanngunneqassaaq:

“§ 22 b. § 22-mi malittarisassat apeqqutaatinnagit misissueqqaarnermut, misissueqqissaarnermut imaluunniit aatsitassanik iluaqutiginninnermut akuersissutit pissarsiarineqarnerinut aningaasartuutit, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu, tamatumani aalajangersakkami malittarisassat malillugit, nalikillilerneqassapput. Imm. 2. Akuersissutit ataasiakkaat imaluunniit akuersissutip ilaannaa tamaasa immikkoortillugit immikkut nalikillileriffigineqartassapput.

Imm.3. Akuersissut ilaannaaluunniit tunineqarpat, ukiumi tunisiffiusumi tunineqartut nalikilliliivigineqarsinnaangilaq.

Imm.4. Pissarsinermit naliusoq ukiumut amerlaqatigiiartunik nalikilliliivigineqartassaaq . Misissueqqaarnissamut, misissueqqissaarnissamut imaluunniit kulbrintinik iluaqutiginninnissamut akuersissutit ukiumi qulini nalikilliliivigineqartassapput, misissueqqaarnissamut,

misissueqqissaarnissamut imaluunniit aatsitassanik iluaqutiginninnissamut akuersissutit ukiuni sisamani nalikilliliissutigineqartassallutik. Akuersissummik pissarsisoqarpat, pissarsiarineqarneraniit imm. 2-mi piffisarititaasoq sivikinneruppat pissarsiarineraniit akigitinneqarsimasup piffissarititaasup sinneruttup iluani ukiumut assigiiamik nalikilliliisoqartassaaq. Nalikilliliineq ukiumi aningaasarsiorfiusumi akuersissummik tamatumaluunniit ilaanik pissarsiffiusumi aallartinneqassaaq. Imm. 5. Akuersissut taassumaluunniit ilaa pissarsiarineqarnerani akiusumit nalikilliliivigineqanngitsumit annertunerusumik akilersillugu tunineqarpat, iluanaarutaasoq ukiumi tunineqarfigisaani akileraarutaasussanik isertitanut ilanngunneqassaaq.

Imm. 6. Akuersissut taassumaluunniit ilaa pissarsiarineqarnerani akiusumit nalikilliliivigineqanngitsumit annikinnerusumik akilersillugu tunineqarpat, amigartoorutaasoq ukiumi tunineqarfigisaani akileraarutaasussanik isertitanit ilanngaatineqassaaq.

Imm. 7. § 24, imm. 1, nr. 1 naapertorlugu misissueqqaarnernik, misissueqqissaarnernik imaluunniit aatsitassanik iluaqutiginninnermik nalikilliliinerit pillugit erseqqinnerusumik malittarisassanik Naalakkersuisut aalajangersaasinnaapput.

5. § 58-ip kingornanut **kapitali 6-ilu** sioqqullugu kapitalitut nutaatut ilanngunneqassaaq:

“ **Kapitali 5 a.**

Allanguineq allallu

§ 58 a, Suliffeqarfik § 2, imm. 2-mi taaneqartoq killilimmik akileraartussaataitaasoq aktieselskabimut anpartsselskabimulluunniit, Kalaallit Nunaanni nalunaarsugaasumut, allanngortinneqarpat tunineqarpalluunniit, aktieselskabi anpartsselskabilluunniit suliffeqarfiup killilimmik akileraartussaataitaasup akileraartarnermut tunngatillugu killiffigisaaniit ingerlaqqissinnaavoq. Suliffeqarfimmili killilimmik akileraartussaataitaasumi, § 22, imm. 2-mi annertussutsinit taaneqartunit annikinnerusumik nalikilliliineqarsimappat, suliffeqarfiup killilimmik akileraartussaataitaasup nalikillilerineri killiffigisaa appartinneqassaaq, suliffeqarfiup killilimmik akileraartussaataitaasup pigisaasa § 22, imm. 2-mi taaneqartunik annertussutsit naapertorlugit appartinneqarsinnaasimasaraluannut. Naalakkersuisut, Naalakkersuisulluunniit tamatumunnga pisinnaatitaat, aalajangersakkami oqaaseqatigiit suilliit tulliini aalajangersakkanut tunngatillugu tamakkiisumik ilaannaasumilluunniit immikkut akuersissuteqarsinnaapput, pissutsit immikkut ittut tamanna pisariaqartippassuk.

Imm. 2. Akileraartarnermut tunngatillugu ingerlaqqiinnarnissamut piumasaqaataavoq aktieselskabip anpartsskabilluunniit suliffeqarfiup killilimmik akileraartussaataitaasup pisuussutinik pigisai tamakkerlugit pigilissagai, tamatumani aamma suliffeqarfittut ingerlateqqinneqartutut isumaqatigiissuteqarfigisimasanut, pisortani oqartussanut allanullu pisinnaatitaalluni pisussaaffeqarlunilluunniit.

Imm. 3, Aammattaq piumasaqaatit imaattut naammassineqarsimassallutik:

- 1) Naalakkersuisut akuersissummik tunisineq, aatsitassat pillugit ingerlatallu tamatumunnga pingaarutillit pillugit Inatisartut inatsisaanni aalajangersakkat malillugit akuersissutigereersimassavaat.
- 2) Allanguineri tunisinermiluunniit pigisat akiligassallu, suliffeqarfimmut killilimmik akileraartussaataitaasumut § 2, imm. 2 malillugu tunngatinneqarsinnaasut ilaatinneqassapput pigisallu akiligassallu taamaattuinnaat pineqarlutik.

3) Selskabip ingerlaqqittup allannguinerup tunineqarnerulluunniit aalajangiiffigineqarneraniit ullut 30-t qaangiutsinnagit akileraaruseriffik allannguinerup tunineqarnermilluunniit ilisimatitsissuteqarfigissavaa selskabillu ingerlaqqittup nalunaarsugaaneranut imaluunniit Erhvervs- og Selskabsstyrelsemi nalunaarsorneqarnissaanut nalunaarutigineqarsimaneranut uppersaatit nassiullugit.

4) Akileraarutinik ingerlatsineq pillugu Inatsisartut inatsisaanni § 16, imm. 3-mi piffissaliussaq apequtaatinnagu kingusinnerpaamik allannguinerup tunineqarnerulluunniit aalajangiiffigineqarneraniit ullut 90-it qaangiunneranni pisariaqartitsineq naapertorlugu suliffeqarfimmut killeqartumik akileraartussaataasumut nammineerluni nalunaarsukkamik nassiussineqassaaq. Suliffeqarfiup killilimmik akileraartussatitaasup nalinginnaasumik ukiup aningaasarsiorfiusup naaneraniit allannguinerup tunineqarnerulluunniit ulluanut isertitanik akileraarutaasussanik naatsorsuineri isertitat, piffissaq tamaat atorneqassaaq, piffissap pineqartup qanoq sivisutiginera apequtaatinnagu. Akileraarutaasussanik annertussusiliineq pissaaq suliffeqarfimmik killilimmik akileraartussaataasumik allannguinerup tunineqarneranulluunniit atatillugu atorunnaarneq apequtaatinnagu. Selskabip ingerlaqqittup pisussaaffigaa oqaaseqatigiit aappaanni taaneqartumik piffissamut nammineerluni nalunaarummik tunniussissalluni. Selskabip ingerlaqqittup akileraarutinik akiligassajunnarsinnaasut akisussaaffigai aammalu akiliisitsinernut sunulluunniit akisussaasuulluni, inatsimmi matumani aalajangersakkat tunngavigalugit, suliffeqarfimmut killilimmik akileraartussaataasumut piimasarineqarsinnaasunut akiliisussaasuvoq. Selskabi ingerlaqqittoq, suliffeqarfik killilimmik akileraartussaataasooq paarlallugu, akileraaruserinerup ingerlatsineq pillugu Inatsisartut inatsisaanni § 27, imm. 5 naapertorlugu akileraaruseriffik, tapisianik akileraarutaavallaarsimasunillu piimasaqarfigisinnavaa.

5) Suliffeqarfik killilimmik akileraartussaataasooq akileraarutinut, akitsuutinut allanilluunniit pisortanut akiligassanik kinguaattooruteqassanngilaq, aammalu allanngornerup tunineqarnerulluunniit ulluanit ullut 90-it sinnerlugit ukiumi aningaasarsiorfiusumi siulii pillugit pisariaqartumik nammineerluni nalunaarsukkamik tunniussineqarsimassalluni.

Imm. 4. Imm. 1-imi taaneqartutut allannguinerup tunineqarnermulluunniit atatillugu uppersaatinik nassiussisarnissamut aammalu uppersaatit taamaattut nassiunneqarnissaanut piffissaliussamik erseqqinnerusumik malittarisassanik Naalakkersuisut aalajangersaasinnaapput.

§ 58 b . Pigisat nalillit akiligassallu allannguinerup tunineqarnermulluunniit atatillugu pissarsiarineqartut selskabip isertitanik akileraaruteqaataasussanik naatsorsuineri, suliffeqarfiup killilimmik akileraartussaataasup piffissami aningaasarsiorfiusumi selskabimit pissarsiarineqarsimasutut, pissarsiarineqarnerannilu, pigisat nalillit akiligassallu suliffeqarfimmit killilimmik akileraartussaataasumit pissarsiarineqarsimaneranni akiusunik pissarsiarineqarsimasutut isigineqassapput. Akileraarnermi nalikillilerisinnaanerit suliffeqarfimmit killilimmik akileraartussaataasumit naammassineqarsimasut, selskabimit ukiumi aningaasarsiorfiusumi pineqartumi naammassineqartutut isigineqarput, taamatullu §§ 16-18-imi aalajangersakkat naapertorlugit annasaqaatinik iluanaarutinilluunniit naatsorsuineq suliffeqarfiup killilimmik akileraartussaataasup pissarsiarineranni akiliutigisimasai tunngavigalugit naatsorsorneqassallutik.

Imm. 2. Pigisat nalillit akiligassallu suliffeqarfimmit killilimmik akileraartussaataasup iluanaarniapiluutugalugit pissarsiniutugaluguluunniit pissarsiarisimasai, selskabip ingerlaqqittup isertitanik akileraaruteqaataasussanik naatsorsuineri selskabimit taassuminnga

iluanaarniapiluutigalugu pissarsiniutigaluguluunniit pissarsiarineqarsimasutut suliarineqassapput. Allanguinermi tunineqarnermiluunniit pigisat nalillit akiligassalluunniit suliffeqarfimmiit killilimmik akileraartussaataasumiit selskabimut ingerlaqqittumut nuussimanerat, selskabip ingerlaqqittup isertitaanik akileraaruteqaataasussanik naatsorsuinermi pigisat nalillit akiligassallu iluanaarniapiluutigalugit pissarsiniarnermiluunniit pissarsiarineqarsimasutut isigineqarsinnaanerannut ajoqutaanngilaq.

Imm.3. suliffeqarfiup killilimmik akileraartussaataasup isertitanik akileraarutaasussanik naatsorsuinermini pappiaqqanik aningaasanik nalilinnit iluanaarutit annaasaqaatilluunniit suli piviusunnigortinneqanngitsut ilanngussimappagit, pappiaqqat aningaasanik nalillit selskabip ingerlaqqittup isertitaanik akileraaruteqaataasussanik naatsorsuinermi iluanaarutit amigartoorutillu ilanngunneqarsimasutut isigineqassapput.

Imm.4. Pigisanik nalilinnik akiligassanillu, selskabip ingerlaqqittup suliffeqarfimmit killilimmik akileraartussaataasumit pissarsiarisimanngisaanik akileraartarnermut tunngatillugu suliaqarneq, allanguinerup tunineqarnerulluunniit kingunerisaanik allannguuteqassanngilaq, pigisat nalillit akiligassallu allanguinermi tunisinermiluunniit pissarsiarineqarsimasutut uppersarnerqarsinnaasut selskabip ingerlaqqittup naatsorsuutaani aammalu akileraartarnermut naatsorsuusiani immikkut inissitatut takuneqarsinnaappata. Taamaanngippat killilimmik akileraartussaataasumut imaluunniit selskabimut ingerlaqqittumut atuuttuusunik malittarisassat pigisanut nalilinnut akiligassanullu tunngatillugu atorneqassanersut akileraaruseriffiup aalajangissavaa.

§ 58 c, Aatsitassat pillugit ingerlatallu tamatumunnga pingaaruteqartut pillugit Inatsisartut inatsisaat naapertorlugu atorlussiassanik aatsitassanik pisunik misissueqqaarnermut misissueqqissaarnermulluunniit akuersissut tamatumaluunniit ilaa, pisisup akuersissutip pisiarineranut atatillugu atorlussiassanik aatsitassanik pisunik misissueqqaarnermut misissueqqissaarnermulluunniit aningaasartuutit akilerlugit pisiarippagu, tunisisup isertitat akileraarutaasussanik naatsorsorneranni akiliut ilanngutinngitsoorsinnaavaa, piumasaqaatit makkua naammassineqarsimappata:

1) Akiliutigineqartoq tassaappat tunisisup misissueqqaarnermut imaluunniit misissueqqissaarnermut siunissami aningaasartuutigisassaanit isumaqatigiissuteqarnikkut aalajangeriikkamik annertussuseqartumik akileeqataassummik, isumaqatigiissuteqarnerup kingornagut ukiut tunisaqartup isertitaqarfigisaasa ukiut tallimassaat qaangiutsinnagu, akiliuteqarpat. Aningaasartuutitut akileeqataassut annertunerpaaffissarititaasumut annertunerpaaffeqartinneqarsinnaavoq.

2) Aningaasartuutit tamarmik suliffeqarfimmut aningaasartuuteqartumut ingerlatsinermi aningaasartuutitut ilanngaatineqarsinnaapput.

Imm. 2. Imm. 1-imi aalajangersagaq selskabit suliffeqarfissuup aqqissuussaanerani, § 36 a, imm. 4 aamma 5 naapertorlugit, attaveqartuusut akornanni tunisinerni atuutinngilaq.

Imm.3. Imm, 1 nr .1-imi oqaatigineqartumik piffissaliunneqartoq akileraaruseriffiup ukiut pingasut tungaannut sivitsorsinnaavaa oqaatigineqarsinnaappat attaveqartitsinermi imaluunniit pinngortitami pissutsinik patsiseqartumik isumaqatigiissut piffissami aalajangigaasumi naammassineqarsinnaanngitsoq.

Imm. 4. Imm. 1-imi taaneqartup saniatigut akissarsiat pisiffigineqartup isertitaanik akileraaruteqaataasussanik naatsorsuinermi ilanngunneqassapput.

Imm.5. Pisisup imm. 1-imi taaneqartumik akiliutip ilaa, imm. 1, nr. 1-imi, takuuk imm. 3,

oqaatigineqartumik piffissaliunneqartup qaangiutereernerani akilerpagu, pisiffigineqartup akiliutip ilaa akilerneqartoq taanna, ukiumi akiliutissap ilaata piffissaliunneqartup qaangiutereernerani akilerneqarnissaanik paasinniffiusumi, isertitanit akileraarutaasussanik naatsorsorneranni ilanngutissavaa, kingusinnerpaamilli ukiumi aningaasarsiorfiup piffissaliunneqartup naaffigisaani.”

6. § 66, imm. 1, oqaaseqatigiit siulliit, imatut oqaasertaqartinneqassapput:

”Imm. 1. § 1, imm. 1, nr. 1-imi aamma 2, imm. 2-mi, aammalu § 2, imm. 1, nr. 1, 3, 4, 5, 6, 17, aamma imm. 5, oqaaseqatigiinni siulliit tulliini oqaatigineqartut inuit akileraartussaataasutut taaneqartuni isertitat akileraarusigassat tassaapput isertitat akileraaruteqaataasussat inummut ilanngaammik ilanngarneqareersimasut, tak. § 67, isertitat koruunit 100-mik agguarneqarsinnaasunut ammut akunnaallineqarsimasut.”

7. § 68, imm. 2, imatut oqaasertaqartinneqassaaq:

” Imm. 2. Akileraaruseriffik kommunitut akileraarfittut isigineqassaaq, imaattoqartillugu:

1) Imm. 1-imi oqaatigineqartunik attaveqarneq tassa sumiiffimmut kommunit aggornerisa avataanni inissisimasumut attaveqarneq.

2) Akileraartussaataasooq aatsitassat pillugit ingerlatallu tamatumunnga pingaaruteqartut pillugit Inatsisartut inatsisaat naapertorlugu akuersissummik tunineqarsimappat,

3) Akileraartussaataasooq misissueqqaarnermut misissueqqissaarnermullu akuersissummik tunineqarsimappat taamaallaallu suliffeqarfimmik ingerlatsilluni aatsitassat pillugit ingerlatallu tamatumunnga pingaaruteqartut pillugit Inatsisartut inatsisaat naapertorlugu akuersissutip kingunerisaanik,

4) Akileraartussaataasooq § 32, imm. 3-mi pineqartunut ilaappat,

5) Akileraartussaataasooq sermip erngullu avammut nioqqutissatut atorneqarnissaat pillugu Inatsisartut inatsisaat naapertorlugu akuersissummik tunineqarsimappat,

6) Akileraartussaataasooq misissueqqaarnissamut misissueqqissaarnissamullu akuersissummik tunineqarsimappat taamaallaallu sermip erngullu avammut nioqqutissatut atorneqarnissaat pillugu Inatsisartut inatsisaat naapertorlugu akuersissutip kingunerisaanik suliffeqarfimmik ingerlatsilluni,

7) Inuk atorfeqartitaanermi atatillugu ingerlatani sulianik, sanaartornermi sulianik aammalu ikkussuineramik ivertiterineramik illoqarfiit nunaqarfiillu piusut avataanni sanaartornermi suliaqartoq, atorfeqartuusoq qaammatip siuliini kingullerni arfinilinni nunami maani kommunimut akileraartussaasimangippat, imaluunniit

8) Inuk nr. 2-4-mi pineqartumik akileraartussaataasumi atorfeqartitaasooq atorfeqartitaasorlu qaammatip siuliini arfinilinni kingullerni nunami maani kommunimut akileraartussaasimanani.”

8. § 72-ip kingornagut ilanngunneqassaaq:

“§ 72 a, Inuit § 68, imm. 2, nr. 7 naapertorlugu akileraartussaataasut atorfeqartitaa-nerminnut atatillugu ingerlatani sulianik, sanaartornermi sulianik aammalu ikkussuineramik ivertiterinermilu illoqarfiit nunaqarfiillu piusut avataanni sanaartornermi suliaqartut, aammalu qaammatip siuliini arfinilinni kingullerni nunami maani kommunimut akileraartussaataasimangitsut, atorfeqartitaanermi aningaasarsiaminnit Nunatta karsianut 35 procentimik inaarutaasumik akileraassapput (tamakkiisumik akileraarut). Aningaasarsianit ilanngaateqartoqarsinnaangilaq, tamatumani aamma ukiuni siusinnerusuni aningaasarsiorfiusuni amigartoorutinik, taamatullu § 4, imm. 2, aamma § 4 e

atorneqarsinnaanatik. Aningaasarsiat pissarsiarinerannut, qulakkeerneqarnerannut aammalu ingerlaannarnissaannut aningaasartuutit akileraartussaataasumi aningaasarsianut allanut ilanngaatigineqarsinnaanngillat. Aningaasarsianit pissarsiarineqartunut tunngatillugu akileraartussaataaneq inaarutaasumik naammassineqassaaq akileraarutinut akiliutaasutigut.

Imm. 2. Atorfeqartitaanermi aningaasarsiat, imm.1 naapertorlugu, A-tut B-tullu aningaasarsiaapput, pensioninut inunermullu sillimmasiissutinut aaqqissuussinernut akiliutit, § 39, § 40 imaluunniit § 43-mi aalajangersakkani pineqartut, ilaatinneqanngiinnarlutik.

Imm. 3. Imm. 1-imi aalajangersagaq atuutissanngilaq, inuk peqatigitillugu aningaasarsianik A-nik allanik isertitaqarpat, Kalaallit Nunaanni akileraarutaasussanik.

Imm .4. Inuk imm. 1-imi taaneqartoq, imm. 3 naapertorlugu atorfeqartitaanermi aningaasarsiat saniatigut isertitaqarpat, taakkua saniatigut isertitat inatsisip matuma aalajangersagarisai allat malillugit akileraaruserneqassapput.

Imm. 5. Inuup ukiumi aningaasarsiorfiusumi akileraarutaasussanik isertitai tamarmiusut, imm. 1-imi aalajangersakkat malillugit 50 procentii amerlanerusulluunniit akileraaruserneqarpata, § 4 d, imm. 2-mi aamma § 4 e-mi aalajangersakkat atorneqassanngillat.

§ 72 b. Inuit akileraartussaataasut atorfeqartitaanerminnut atatillugu annertunerpaamik suliassanik, aatsitassat pillugit ingerlatallu tamatumunnga pingaaruteqartut pillugit Inatsisartut Inatsisaat naapertorlugu misissueqqaarnermut, misissueqqissaarnermut imaluunniit aatsittassanik iluaqutiginninnermut attuumassuteqartunik, aalajangersimasuunerusunik suliaqartut, qaammatillu siuliini qaamatini arfinilinni nunami maani kommunitum akileraartussaataasimannngitsut, atorfeqartitaanermi akissarsiat 35%-iini, nunatta karsianut inaarutaasumik akileraartassapput (tamakkiisumik akileraarutit). Aningaasarsianit ukiuni aningaasarsiorfiusuni siusinnerusuni amigartoorutinik ilanngaateqartoqarsinnaanngilaq, taamatuttaaq § 4 d, imm. 2, aamma § 4 e, atorneqassanatik. Aningaasarsiat akissarsiarineqartartut pissarsiarinerannut, qulakkeerneqarnerannut ingerlaannarnissaannullu aningaasartuutit akileraartussatitaasup allatigut aningaasarsianit ilanngaatigineqarsinnaanngillat. Atorfeqarnermi aningaasarsiarisartakkanut tunngatillugu akileraartussaataaneq inaarutaasumik naammassineqassaaq akileraarutinut akiliutinik akilersinneqartutigut.

Imm. 2. § 72, imm. 2-5-imi aalajangersakkat taamatulli atorneqassapput.

9. § 76, imm. 2, oqaaseqatigiit siulliit tulliini, ” akileraarutit A-nik” kingornatigut ilanngunneqassaaq, ”takuulli § 72 a, imm. 1 aamma 2 aammalu § 72 b”

10. § 79, imm. 2, oqaaseqatigiinni siullerni ”akileraarutinik unerartitsineqalersinnagu”-p kingornanut ilanngunneqassaaq: ”takuulli § 72 a, imm. 1 aamma 2, aammalu § 72 b”.

11. § 79, imm. 4-mi ” §§ 61-64”, kingornanut ilanngunneqassaaq “, § 72 a, imm. 1 aamma § 72 b, imm. 1“.

12. § 86, imm. 4, imatut oqaasertalerneqassaaq:

”Imm. 4. Akileraarutit iluanaarutisianit tamarmiusunit naatsorsorneqassapput. Taamaattorli selskabi, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu misissueqqaarnissamut, misissuinissamut imaluunniit piaanissamut akuersissummik

nalunaarfigineqarsimasoq, akileraarutissanik naatsorsuinermi, selskabip iluanaarutisianik agguassaasa akileraarusersorneqartut, selskabip iluanaarutininik agguassaat ilanngaatigitinnagit akileraaruteqaataasussanik sinneqartoorutaannit, amerlanerussutaat ilanngaatigisinnaavaat. Oqaaseqatigiit aappaanni taaneqartunik ilanngaatit aningaasarsianit akileraarutit pillugit inatsimmi § 27, imm. 1 naapertorlugu aningaasarsianik akileraaruteqaataasussanik naatsorsuinermi ilanngaatigineqarsinnaanngillat.”

§ 2.

Inatsisartut inatsisaat atuutilissaaq ulloq 1. December 2010, takuulli imm. 2 aamma 3.

Imm. 2. § 1, nr. 2-6 ukiumi aningaasarsiorfiusumit 2010-miit atuutilissapput.

Imm. 3. § 1, nr. 7-11 ukiumi aningaasarsiorfiusumit 2011-miit atuutilissapput.

Kalaallit Nunaanni Namminersorlutik Oqartussat, ulloq 18. november 2010

Kuupik Kleist

/

Palle Christiansen